



- SENAT -

Broj: 01-14-60/26

Sarajevo, 24. 06. 2026. godine

Na osnovu člana 61. Zakona o visokom obrazovanju („Službene novine Kantona Sarajevo“, broj: 36/22 i 28/25) i člana 64. i člana 297. stav (1) Statuta Univerziteta u Sarajevu, a u vezi sa Zahtjevom rektora Univerziteta u Sarajevu, broj: 0101-5385-2/26 od 23. 06. 2026. godine, Senat Univerziteta u Sarajevu je na 20. redovnoj sjednici održanoj 24. 06. 2026. godine, *daje*

AUTENTIČNO TUMAČENJE

odredbe člana 122. i 123., a u vezi sa članom 70. Statuta Univerziteta u Sarajevu, broj: 01-14-35-1/23 od 26. 07. 2023. godine, sa pripadajućim izmjenama i dopunama

Odredbom član 297. stav (1) Statuta Univerziteta u Sarajevu propisano je da obavezno i autentično tumačenje odredaba Statuta daje Senat Univerziteta u Sarajevu.

Odredbe člana 122. i člana 123., a u vezi sa članom 70. Statuta Univerziteta u Sarajevu tumače se tako da osiguravaju kontinuitet rukovođenja članicom Univerziteta i nesmetano obavljanje njene djelatnosti u okolnostima u kojima dekan, zbog suspenzije, prijevremenog razrješenja ili drugih Statutom propisanih razloga, nije u mogućnosti obavljati funkciju.

U slučaju kada je dekan suspendovan sa funkcije u skladu sa članom 70. Statuta, a radi osiguranja kontinuiranog rukovođenja članicom određeno je lice koje obavlja poslove dekana, prestanak razloga zbog kojih je suspenzija određena ne dovodi sam po sebi do prestanka ovlaštenja tog lica ukoliko su u međuvremenu nastupile druge okolnosti propisane Statutom koje predstavljaju osnov za prijevremeno razrješenje dekana ili na drugi način onemogućavaju dekana da nastavi obavljati funkciju.

Kada vijeće članice, u skladu sa članom 122. Statuta, donese odluku o prijevremenom razrješenju dekana, istovremeno je dužno osigurati kontinuitet rukovođenja članicom donošenjem odluke o imenovanju vršioca dužnosti dekana u skladu sa članom 123. Statuta. Ukoliko je za vršioca dužnosti dekana imenovano isto lice koje je prethodno obavljalo poslove dekana za vrijeme trajanja suspenzije, smatra se da nije došlo do prekida u vršenju funkcije rukovođenja članicom, niti do prekida kontinuiteta zastupanja članice pred nadležnim organima i institucijama.

Odredbe člana 70., člana 122. i člana 123. Statuta ne mogu se tumačiti na način koji bi doveo do diskontinuiteta u procesu rukovođenja članicom Univerziteta ili do situacije u kojoj članica nema ovlašteno lice za obavljanje poslova rukovođenja i zastupanja.

Shodno navedenom, u slučaju sukcesivnog nastupanja okolnosti koje predstavljaju osnov za suspenziju dekana, a potom i za njegovo prijevremeno razrješenje, osigurava se kontinuitet rukovođenja članicom Univerziteta, pri čemu lice određeno odnosno imenovano za obavljanje poslova dekana nastavlja vršiti funkciju do izbora i imenovanja dekana u skladu sa Zakonom, Statutom i drugim općim aktima Univerziteta.

Autentično tumačenje predstavlja integralni dio teksta ovog Statuta, te će se primjenjivati od dana donošenja.

REKTOR

Prof. dr. Tarik Zaimović



Dostaviti:

- Članicama Univerziteta u Sarajevu
- Generalnom sekretaru Univerziteta u Sarajevu
- Internet stranica Univerziteta u Sarajevu
- U dokumentaciju Senata Univerziteta u Sarajevu
- Arhivi